

दिनांक 14.07.2024

समय: 18.45 बजे

आकाशवाणी जयपुर-अजमेर  
प्रादेशिक समाचार।

- **एक पेड़ माँ के नाम** अभियान रे तैत देशभर मांय कर्यो जा रह्यो है पौधारोपण – केन्द्रीय गृह अर सहकारिता मंत्री अमित शाह इंदौर मांय करी अभियान री सरूआत।
- प्रदेश मांय बजट घोषणावां रे प्रभावी क्रियान्वयन न लेर जिलां रा प्रभारी मंत्री अर सचिव रह्या दौरै माथे।
- नीति आयोग ई-फास्ट इंडिया पहल रे तैत 'नीति गियर शिफ्ट चैलेंज' सरू करणे री घोषणा करी।
- प्रदेश मांय मॉनसूनी बिरखा रो दौर जारी- आगला 4-5 दिन दक्षिण अर पूर्वी राजस्थान रे न्यारा-न्यारा हलका मांय बिरखा री गतिविधियां मांय बधोतरी रा आसार।

000

केन्द्रीय गृह अर सहकारिता मंत्री अमित शाह आज मध्य प्रदेश रा इंदौर रे **एक पेड़ मां के नाम** अभियान री सरूआत करी। इंदौर एक दिन मांय 11 लाख पेड़ लगाणे रो विश्व रिकार्ड बणा रियो है। इण मौके माथे श्री अमित शाह कहयो के प्रधानमंत्री एक नारो दियो हो अर लोगां ई ने अरज रे रूप मांय लियो। वणां कयो के इंदौर साफ शहर रे साथे-साथ हरित शहर भी बण रह्यो है। वणां कहयो के प्रधानमंत्री भावी पीढियों ने स्वच्छ पर्यावरण देणे रो हेलो कर्यो है, ई खातिर 2 हजार 25 ताई देशभर मांय पेट्रोल मांय 20 फीसदी एथनॉल मिलाणे रो फैसलो कर्यो गयो है। श्री शाह कहयो के सरकार **जलवायु परिवर्तन कोष** री भी सरूआत करी है। वणां कहयो के मोदीजी देश मं पहली बार पर्यावरण विभाग री सरूआत गुजरात मांय करी ही। गृह मंत्री कहयो के मध्यप्रदेश देश रो फेफड़ो हैं। अठे 31 फीसदी वन खेतर है जको देश रो 12 फीसदी है। ओ ही कारण है के राज्य पर्यटन खेतर मांय नुवा मानक गढ़ रह्यो है।

प्रदेश मांय भी 'एक पेड़ मां के नाम' अभियान रे तैत बडे पैमाने माथे पौध रोपण कर्यो जा रह्यो है। इणी कड़ी मं आज चिकित्सा मंत्री गजेन्द्र सिंह खींवसर बीकानेर रा गंगा थियेटर रे कन्ने थापित पार्क मांय पौध रोपण कर्यो। वठीने शिक्षा मंत्री मदन दिलावर अभियान रे तैत जोधपुर रा उम्मेद उद्यान मांय पौधा लगाया। झालावाड़ जिले के प्रभारी मंत्री ओटाराम देवासी पुलिस ट्रेनिंग स्कूल मांय "एक पेड़ मां के नाम" अभियान रे तैत पौधा लगाया। इणी कड़ी मांय चूरू मांय सामाजिक न्याय अर अधिकारिता मंत्री अविनाश गहलोत, डीग मांय प्रभारी मंत्री सुरेश रावत जिला अहलकारां री बैठक ली। वठीने न्यारा-न्यारा जिला मांय प्रभारी मंत्री अर सचिव दौरे माथे रिया।

000

राज्य री बजट घोषणावां ने धरातल माथे उतारने अर वाणे चौखे काम सारू जिला रा प्रभारी मंत्री अर सचिव आज भी प्रभार वाळा जिला रा दौरा माथे है। इण कड़ी मांय पंचायतीराज मंत्री मदन दिलावर जोधपुर मांय कार्यक्रम मांय भाग लियो। वणां "एक पेड़ मां के नाम" अभियान रे तैत उम्मेद उद्यान मांय पौधा लगाया। झालावाड़ रा प्रभारी मंत्री ओटाराम देवासी आज **मिनी सचिवालय सभागार** मांय जिला अहलकारां री बैठक ली। इणसू पैला वणां पुलिस ट्रेनिंग स्कूल मांय "एक पेड़ मां के नाम" अभियान रे तैत पौधा लगाया। बीकानेर रा प्रभारी मंत्री गजेन्द्र सिंह खींवसर आज जिले रा दौरे माथे हैं।

इणी तरह भीलवाड़ा री प्रभारी मंत्री मंजू बाघमार आज जिला कलेक्ट्रेट सभागार मांय **बजट घोषणा क्रियान्वयन** न लेर अहलकारां री बैठक ले रही है। पाली रा प्रभारी मंत्री झाबर सिंह खर्रा आज प्रेस वार्ता मांय बोलता थकां कह्यो के बजट मांय जकी घोषणावां करीजी है। वाने बैगो ही चालू कर्यो जावेला।

.....  
उपमुख्यमंत्री डॉ. प्रेमचन्द बैरवा राजसमंद रा जिला कलेक्ट्रेट सभागार मांय अहलकारां रे साथे समीक्षा बैठक करी। वणां कह्यो के राजसमंद रे विकास खातिर बजट मांय घणी सारी घोषणावां करीजी है वे बेगी ही धरातल माथे निजर आवेला। राजधानी जयपुर मांय प्रभारी मंत्री जोगाराम पटेल कलेक्ट्रेट सभागार मांय अहलकारां री बैठक ली अर जनता सूं जुड़्या मामला ने बेगो ई पूरा करणे रा हुकम दिया। श्री पटेल जिला कलेक्ट्रेट सभागार मांय प्रेसवार्ता मांय बोलता थकां कह्यो के इण बार ओ बजट प्रदेश ने विकास रे गेले माथे आगे बधावण वाळो है। वणां बजट मांय जयपुर जिले ने मिली मिली सौगातां रो जिक करतां थकां कह्यो के बजट मांय आधारभूत संरचना अर शहरी विकास खातिर कई एलिवेटेड अर सड़कां ने बणावण रो काम व्हेला।

वणां कह्यो के जयपुर मांय दिल्ली रा **भारत मण्डपम** री तरह **राजस्थान मण्डपम** बणायो जावेला। केकड़ी रा जिला कलेक्ट्रेट सभागार मांय विधायक शत्रुधन गौतम प्रदेश रे बजट री खास योजनावां री जाणकारी दी। करौली जिले रा प्रभारी मंत्री जवाहर सिंह बेढम स्थानीय खेल संकुल मांय पौधरोपण कर्यो। वणां आमजन सूं बिरखा रे मौसम मांय **प्रति व्यक्ति एक पेड़** लगाणे री अरज भी करी।

टोंक रा प्रभारी मंत्री **हीरालाल नागर** जिला परिषद् सभागार मांय बजट घोषणावां रे क्रियान्वयन न लेर जिला अहलकारां री बैठक ली। वठीने बीकानेर रा प्रभारी सचिव कृष्ण कुणाल अर जिला कलेक्टर नम्रता वृष्टि कोलायत खेतर रे दौरे पर रिया। इण रै चालता वणां स्थानीय गौशाला रो जायजो कर्यो अर पौध रोपण भी कर्यो।

000

नीति आयोग **ई-फास्ट इंडिया** पहल रे तैत **'नीति गियर शिफ्ट चैलेंज'** सरू करण री घोषणा करी है। इण हैकथॉन रो लगस देश री आर्थिक अर पर्यावरणीय चुनौतियां रो समाधान करता व्ह्या भारत मांय कार्बन उत्सर्जन रहित ट्रक वाहनां रे संचालन खातिर **नवीन व्यवसाय मॉडल** ने बधावो देणो है।

नीति आयोग इलेक्ट्रिक ट्रकां रे संचालन मांय वित्तीय, तकनीकी अर परिचालन चुनौतियां रो समाधान करणे वाळा नवीन व्यवसाय मॉडल विकसित करणे खातिर पढेसरिया, परिवहन सेवा पेशेवर, शिक्षाविद अर शोधकर्तावां ने भी बुलायो है। कार्यक्रम मांय **ई-फास्ट इंडिया रा जाण्या-मान्या** लोग, वित्तीय संस्थानां अर उद्योग मंच रा प्रतिनिधि भेळा व्हेला। **'नीति गियर शिफ्ट चैलेंज'** रो आयोजन **आई.आई.एम. बैंगलोर, स्मार्ट फ्रेट सेंटर इंडिया, डब्ल्यूमंत आर.आई. इंडिया** अर दूजा संस्थानां रा सहयोग सूं कर्यो जा रह्यो है। नीति आयोग कह्यो के हैकथॉन दो राउंड मांय व्हेला अर गियर शिफ्ट चैलेंज भारत मांय टिकाऊ माल परिवहन री दिशा मांय एक खास कदम है।

00000

लोकसभा अध्यक्ष ओम बिरला रूस रे मॉस्को मांय भारतीय मूल रा लोगां ने संबोधित करता थकां कह्यो के विदेश मांय रेहवण वाळा भारतीय मूल रा लोग भारत रे विकास अर आधुनिकीकरण मांय खास सहयोगी है। वणां भारत रे निर्माण मांय भारतीय मूल रा लोगां रे अमूल्य योगदान री सराहवना करी। वणां कह्यो के भारतीय मूल रा लोग दूत रे रूप मांय आपरे काम, योगदान अर उपलब्धियां सूं भारत री छवि ने आकार दे रिया है।

श्री बिरला रूस मांय आपरी मातृभूमि री प्रगति ने सक्रियता सूं बधावो देणे अर दोन्यूं देशां रे बीचे संबंधां ने मजबूत बणावण खातिर भारतीय मूल रा लोगां ने प्रोत्साहित कर्यो। भारत-रूस संबंधां न लेर श्री बिरला कह्यो के आपसी विश्वास अर सम्मान इणरो आधार है। वणां कह्यो के दोन्यूं देश कठिन बगत मांय एक-दूजे ने लगोतार सहयोग कर्यो है। श्री बिरला रूस

मांय शुक्रवार ने सम्पन्न व्ह्या दसवें ब्रिक्स संसदीय मंच माथे भारत रे संसदीय प्रतिनिधि मंडल रो नेतृत्व कर रिया हा।

00000

प्रदेश मांय न्यारा-न्यारा हादसा मांय 4 जणा री मौत व्हेगी अर 9 जणा घायल व्हेग्या। जैसलमेर मांय देवा गांव रे कने आज सडक हादसा मांय एक ही पिरवार रा दो जणा री मौत व्हेग्यी अर चार दूजा घायल व्हेग्या। पुलिस बतायो के हादसे रा शिकार लोगां री गाडी बेकाबू हो र पलटगी। ऐ लोग शादी समारोह सूं लौट रिया हा। घायलां रो जवाहर सफाखाना मांय ईलाज चाल रह्यो है। वठीने पाली मांय **गोरमघाट** पर्यटन स्थल मांय रेल पुल माथे सेल्फी ले रिया एक दम्पत्ती ट्रेन रे आणे पर हडबडाहट मांय खाई मांय छलांग लगा दी। हादसा मांय पति-पत्नी गंभीर रूप सूं घायल व्हेग्या।

घटना ने देखता थकां जिला प्रशासन गोरमघाट सैलाणियां खातिर एडवाइजरी जारी कर र पहाडी अर रेलवे ट्रेक माथे फोटोग्राफी नी करणे री हिदायत दी है। वठीने भरतपुर मांय नदबई कुम्हेर मार्ग माथे एक कार ने बचाणे रे जतन मांय जीप पलटणे सूं एक मिनख री मौत व्हेग्यी अर तीन जणा गंभीर रूप सूं घायल व्हेग्या। जीप मांय सवार ऐ लोग दौसा जिले रा रहवण वाळा है अर गोवर्धन जी री परिक्रमा देणे जा रिया हा। करौली मांय बिजली रो करंट लागणे सूं एक मोट्यार री मौत व्हे ग्यी अर एक जणो घायल व्हेग्यो।

0000

राज्य मांय लारला 24 घंटां मांय केई ठोडां माथे हल्की सूं मध्यम बिरखा व्ही। वठीने **जयपुर, झालावाड अर भरतपुर जिला मांय कठे-कठे भारी बिरखा दरज करीजी।** मौसम महकमा रे मुजब सबसू बत्ती 87 मिलीमीटर बिरखा झालावाड रे गंगधार मांय दरज व्ही। दूदू रे मौजमाबाद मांय 86 मिलीमीटर अर डीग मांय 66 मिलीमीटर पाणी बरस्यो। जोधपुर रे ओसियां मांय भी 36 मिलीमीटर बरसात व्ही। इण बीचे टोंक मांय आज सुंवारे व्ही तेज बिरखा रे पाछे केई हलका मांय पाणी भरग्यो। और ब्योरो म्हाणा खबरनवीस सूं-

.....  
मौसम केन्द्र जयपुर रे मुजब पूर्वी राजस्थान रे केई भागां मांय आगले 4-5 दिन मॉनसून रे सक्रिय रेहणे री आस है। इधरे प्रभाव सूं दक्षिणी अर पूर्वी राजस्थान रा कुछ हलका मांय मेघगर्जन रे साथे बिरखा री गतिविधियां मांय बधोतरी होणे सूं अर उदयपुर अर कोटा संभाग मांय कठे-कठे भारी बिरखा होणे री आस है। वठीने पश्चिमी राजस्थान मांय जोधपुर हलका रा केई ठोडा माथे बादल गरजने रे साथे बिरखा होणे री गतिविधियां मांय आगले 4-5 दिन बधोतरी होणे री आस है।

000

पाली जिले रा सोजत उपखण्ड खेतर रा अटपड़ा गांव रा प्राथमिक स्वास्थ्य केन्द्र ने चौखी स्वास्थ्य सेवावां खातिर राष्ट्रीय क्वालिटी एश्योरेंस सर्टिफिकेट खातिर चुण्यो गयो है। मुख्य चिकित्सा अर स्वास्थ्य अधिकारी **डॉ. विकास मारवाल** बतायो के केन्द्र सरकार रा दल अटपड़ा मांय दो दिनां ताईं विजिट कर स्वास्थ्य सेवावां री जांच करी। **पीएचसी** अटपड़ा सगळा 6 खेतरां मांय चौखो काम करता व्ह्या 96 फीसदी अंक रे साथे राष्ट्रीय क्वालिटी एश्योरेंस सर्टिफिकेट खातिर चुण्यो गयो। मारवाल बतायो के इण चिकित्सा संस्थान ने निर्धारित मापदंड रे मुजब प्रोत्साहन रकम दी जावेली।